

## Naqqiut

Siunnersuut 15. august 2019-imeersaq taarserpaa

(Siunnersuutip kalaallisut allanneqarnerani oqaatsitigut annikitsumik iluarsiisoqarpoq.

Allanguutit § 37-imi aamma § 60, imm. 7-imi pineqarput)

**Uunga siunnersuut: Inissianik attartortitsisarneq pillugu Inatsisartut peqqussutaata allanngortinneqarnissaa pillugu Inatsisartut inatsisaat nr. xx, xx. xxx 2019-imeersaq**  
(Pisortat inissiaataanni uumasuuteqarnissamut tunngatillugu maleruagassat allanngortinneqarnerat aamma attartortup toqukkut qimagunnerani il.il. attartukkap tiguneqartarnera pillugu)

## § 1

Inissianik attartortitsisarneq pillugu Inatsisartut peqqussutaat nr. 2, 12. maj 2005-imeersumi, Inatsisartut peqqussutaanni nr. 14, 20. november 2006-imeersumi, Inatsisartut peqqussutaanni nr. 9, 5. december 2008-imeersumi aamma Inatsisartut inatsisaanni nr. 17, 8. juni 2017-imeersumi, makkua allanngortinneqassapput:

1. § 37, imm. 5-imi, ”§ 50, imm. 5” allanngortinneqarpoq imatut: ”§ 50, imm. 7”.

2. § 50, imm. 3-5, atorunnaarsinneqarput, tamatumunngalu taarsiullugu imm. 3-7-iut ilanngunneqassapput:

” Imm. 3. Namminersorlutik Oqartussat aamma kommunit inissiaataanni attartortittakkani uumasuuteqarnissaq akuerisaavoq, taamaattoq takukkit imm. 4-7.

Imm. 4. Imm. 3 apeqqutaatinnagu, taamaattoq najugaqatigiiffimmi pineqartumi uumasuuteqarneq akuerisaassanngitsaq, najugaqatigiiffimmi siulersuisut aalajangersinnaapput.

Imm. 5. Ilanngussaq 4 naapertorlugu uumasuuteqarneq pillugu torersaarnissamut maleruagassani piumasaqaatit sukkulluunniit naammassineqarsimassapput.

Imm. 6. Uumasuuteqalernerme attartortoq qaammata pingasuni ineqarnermut akiliutip annertoqqataanik immikkut qularnaveeqqusiissaaq. Attartortup uumasuuteqalernerme qularnaveeqqusiussassaaq attartortitsisumut aningaasanngorlugu akilissavaa. Uumasuutigineqartoq toquppat imaluunniit attartortoq allatut uumasuuteqarunnaarpat, attartortitsisoq illuutip attartorneqartup misissoreernerani aalajangersinnaavoq, attartortup qularnaveeqqusiussaasa uninngatinnissaannut piumasaqaatit atuukkunnaassasut aammalu aningaasat tamakkiisumik ilaannaasumilluunniit utertillugit tunniullugit.

Imm. 7. Imm. 6-imi qularnaveeqqusiussatut akiliutigineqartut, ajoqusiinernut uumasuuteqarnermit pilersinneqartunut matussutissatut, attartortitsisup atorsinnaavai.”

3. § 60 imatut oqaasertalerneqarpoq:

” § 60. Attartortup toqunerani katissimallugu aapparisaq imaluunniit aappaasutut nalunaarsorsimasooq maannamut atugassarititaasut tunngavigalugit attartortunngornissamut

pisinnaatitaavoq, taamaattoq takuuk § 63, imm. 3. Piumasaqaataavoq katissimallugu aapparisaq imaluunniit aappaasutut nalunaarsorsimasoq, attartortup toqunissaa minnerpaamik qaammatinik arfinilinnik sioqqullugu attartortup inoqutaanni ataatsimut illoqataasimassasoq aammalu inuit allattorsimaffianni nalunaarsorsimassasoq.

*Imm. 2.* Imm. 1 taamaaqataanik attartortup inooqataanut atuuppoq. Inooqataasutut isigineqarpoq inuk attartortup katissimalluni aappariinnut assingusumik inooqatigisaa.

*Imm. 3.* Imm. 1 taamaaqataanik attartortup meeraannut 18-it sinnerlugit ukiulinnut atuuppoq. Meeraq illoqarfimmi allami ilinniarnerninik naammassereernermini imaluunniit unitsitsereernermini ingerlaannaq attartukkami inuit allattorsimaffianni nalunaarsorsimalersimappat, ilinniariarsimaneq imm. 1 malillugu naatsorsuinermi ilanngunneqassaaq. Meeqqat angerlarsimaffimmi najugaqartut arlallit attartortunngornissamik kissaateqarpata, meeraq attartortup toqunissaa sioqqullugu piffissami sivisunerpaami attartortup inoqutaanni ataatsimut illoqataasimasoq aamma inuit allattorsimaffianni nalunaarsorsimasoq, salliutinneqassaaq.

*Imm. 4.* Imm. 1 taamaaqataanik attartortup angajoqqaavinut atuutissaaq. Angajoqqaat marluullutik attartortunngornissaq kissaatigippassuk, angajoqqaq attartortup toqunissaa sioqqullugu piffissami sivisunerpaami attartortup inoqutaanni ataatsimut illoqataasimasoq aamma inuit allattorsimaffianni nalunaarsorsimasoq, salliutinneqassaaq.

*Imm. 5.* Sulisunut inissiaq tassani pineqarpat, attortortumut pisortani sulisitsisuni atorfeqarnera aqutigalugu innersuunneqarsimasoq, attartortup katissimallugu aapparisaq, aappaasutut nalunaarsorsimasoq, meeqqat 18-it sinnerlugit ukiullit imaluunniit angajoqqaat attartornermut atugassarititaasut nalinginnaasut tunngavigalugit inissiamut innersuunneqarnissamut pisinnaatitaapput, taamaattoq takuuk § 63, imm. 2-3. Innersuussinissamut piumasaqaataavoq attartortup katissimallugu aapparisaq, aappaatut nalunaarsorsimasoq, meeraq 18-it sinnerlugit ukiullit imaluunniit angajoqqaavi nammineerlutik pisortani sulisitsisumi atorfeqarnertik aqutigalugu sulisunut inissiamut innersuunneqarnissamut pisinnaatitaassanngitsut

*Imm. 6.* Attartortoq ukioqqortussutsini imaluunniit napparsimanini pissutigalugu utoqqaat illuannut assigisaanulluunniit nuuppat, imm. 1-5-imi aalajangersakkat taamaaqataanik atuutissapput.

*Imm. 7.* Imm. 1-4 malillugit attartukkamik tigusinissamut pisinnaatitaaneq, attartortup katissimallugu aapparisaanut, aappaatut nalunaarsorsimasumut, meeqqanut angerlarsimaffimmi najugaqartunut 18-it sinnerlugit ukiulinnut imaluunniit angajoqqaavinut, taaneqarnerisa tullerinneri malillugit, atuuttussanngortinneqarsinnaapput.”

**4.** § 63, imm. 2-imi ”§ 60, imm. 2” allanngortinneqarpoq uunga: ”§ 60, imm. 4”.

**5.** § 63, imm. 3-imi ”§ 60, imm. 1” allanngortinneqarpoq uunga: ”§ 60, imm. 1-4”.

**6.** *Ilanngussaq* 4-imi, qulequttap ”Uumasuutit” ataani immikkoortoq imatut oqaasertalerneqarpoq:

”Aallaaviatigut qimmiuteqarnissaq imaluunniit qitsuuteqarnissaq, kiisalu aalisagaasivimmiittunik aalisagaateqarnissaq, ineqartinneqartunik timmiaateqarnissaq,

kikkaasunik ineqartinneqartunik aamma saanilunnik assigisaannilluunniit uumasuuteqarnissaq akuerisaavoq.

Taamaattoq najugaqatigiiffimmi siulersuisut aalajangersinnaapput qimmiuteqarneq qitsuuteqarnerlu taamaakkaluartoq najugaqatigiiffimmi akuerisaassanngitsoq. Qimmiutinut qitsuutinullu immikkut qularnaveeqqusiinissaq attartortitsisup piumasarisavaa. Attartortup kommunimi qimmiuteqarnermut qitsuuteqarnermullu malittarisassiani maleruagassat sukkulluunniit naammassisimassavai. Maleruagassat taakkua naammassineqanngippata, ileqqorissaarnissamut maleruagassat unioqquatinneqarsimasutut isigineqassaaq. Ileqqorissaarnissamut maleruagassat unioqquatinneqarnerannut naammagittaalliuutigineqartut attartortitsisumut ingerlatinneqassapput.”

## § 2

Inatsisartut inatsisaat ulloq 1. januar 2020 atuutilerpoq.

*Namminersorlutik Oqartussat, ulloq xx. xxx 2019*

Kim Kielsen